

HUGHES, ANNIE HARRIET ('Gwyneth Vaughan '; 1852 - 1910), llenor

Enw: Annie Harriet Hughes
Ffugenw: Gwyneth Vaughan
Dyddiad geni: 1852
Dyddiad marw: 1910
Priod: John Hughes
Plentyn: Arthur Hughes
Rhiant: Bennet Jones
Rhyw: Benyw
Galwedigaeth: llenor
Maes gweithgaredd: Llenyddiaeth ac Ysgrifennu
Awdur: Richard Bryn Williams

Ganwyd yn Bryn y Felin, Talsarnau, Meirionnydd, merch Bennet Jones, melinydd, a'i haddysgu yn ysgol Llandecwyn. Priododd, 1876, John Hughes Jones, meddyg o Glwt y Bont, Arfon, ond rhoes heibio'r cyfenw 'Jones.' Bu'n byw yn Llundain, Treherbert, a Clwt y Bont, nes marw ei gŵr yn 1902. Symudodd i Fangor, ac er ei thlotod rhoes yr addysg orau i'w phedwar plentyn. Yn 1893-6 sefydlodd 143 cangen o'r 'British Women's Temperance Association,' bu'n ysgrifennydd mygedol y 'Welsh Union of Women's Liberal Association' am 10 mlynedd, yn un o sefydlwyr 'Undeb y Ddraig Goch' a 'Cymru Fydd,' ac yn is-lywydd 'An Comunn Gaedhealach' yr Alban yn 1903. Hi oedd yr unig ferch ar fwrdd gwarcheidwaid Caernarfon a chyingor dosbarth Gwyrfai, 1894-1901. Bu farw 25 Ebrill 1910 ym Mhwlheli, a'i chladdu yn Llanfihangel y Traethau 29 Ebrill. Ymhlith ei gweithiau y mae pedair nofel, (1) *O Gorlannau'r Defaid*, 1905; (2) *Plant y Gorthrwm*, 1908; (3) *Cysgodau y Blynnyddoedd Gynt* (yn *Y Brython*, 1907-8), (4) *Troad y Rhod* (yn *Y Brython*, 1909) (nas gorffennwyd). Golygodd argraffiadau Cymraeg o dri o weithiau Henry Drummond, (1) *Y Pennaf Peth yn y Byd*, (2) *Y Ddinas heb ynddi Sylfeini*, a (3) 'Program Cristnogaeth' (nis cyhoeddwyd). Ceir llawer o'i gwaith, yn rhyddiaith a barddoniaeth, yn *Cymru (O.M.E.)*, *Yr Haul*, *Perl y Plant*, *Cymru'r Plant*, *Y Genhinen*, *Papur Pawb*, *Y Cymro*, *Celtia*, *Celtic Review*, *Young Wales*, etc., o tua 1897 ymlaen a bu'n golygu, 'Colofn y Merched' yn *Yr Eryr*, 1894-5, *Y Cymro*, 1906-7, a'r *Welsh Weekly*, 1892.

Awdur

Y Parchedig Richard Bryn Williams, (1902 - 1981)

Ffynonellau

Gwybodaeth bersonol

Darllen Pellach

Rosanne Reeves, *Dwy Gymraes, Dwy Gymru: Hanes Bywyd a Gwaith Gwyneth Vaughan a Sara Maria Saunders* (Gwasg Prifysgol Cymru 2014)

Erthygl Wicipedia: [Ann Harriet Hughes](#)

Dolenni Ychwanegol

VIAF: [39144857](#)

Wikidata: [Q4766441](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/>

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

